

Broj: UPI/03-23-2-306/17  
Sarajevo, 25. 10. 2017. godine

Federalno ministarstvo prostornog uređenja, rješavajući po zahtjevu investitora Rudnici mrkog uglja »Banovići« d.d. Banovići, za izdavanje načelnog odobrenja za rađenje za složenu energetska građevina Termoelektranu »Banovići«, Blok 1 (350 MW), područje općine Banovići, na osnovi člana 123. i 218. Zakona o upravnom postupku »Službene novine Federacije BiH« broj 2/98 i 48/99), d o n o s i

## ZAKLJUČAK

Odbacuje se zahtjev Rudnika mrkog uglja »Banovići« d.d. Banovići iz Banovića, II. Armije BiH 52, kojim se traži izdavanje načelnog odobrenja za građenje za složenu energetska građevina Termoelektranu »Banovići«, Blok 1 (350 MW), područje općine Banovići, kao preuranjen.

## O b r a z l o ž e n j e

Razmatrajući zahtjev investitora - Rudnika mrkog uglja »Banovići« d.d. Banovići, sa sjedištem u II. Armije BiH 52. u Banovićima, kojim se traži izdavanje načelnog odobrenja za građenje za složenu energetska građevina Termoelektranu »Banovići«, Blok 1 (350 MW), ovo Federalno ministarstvo je, nakon uvida u dostavljenu dokumentaciju i pribavljena akta, te analize svih do sada prikupljenih dokaza i činjenica, zaključilo da je predmetni zahtjev potrebno odbaciti kao preuranjen, iz sljedećih razloga:

Mogućnost izgradnje i funkcioniranja termoenergetskog postrojenja TE Banovići, snage 350 MW, ovisi o rješavanju više složenih pitanja koja se odnose na tehnologiju sagorijevanja, parametre energetskog bloka, snabdijevanje ugljem, snabdijevanje vodom, odvod čvrstih produkata sagorijevanja, odvod dimnih gasova, odvod padnih voda, te upotrebu i transport produkata sagorijevanja.

U vezi s navedenim, potrebno je istaći činjenicu da je u predmetnom zahtjevu riječ o veoma složenoj energetskoj građevini, koja se osim energane sastoji od više međusobno povezanih i međusobno uslovljenih dijelova i tehnoloških cjelina, kojima se redviđaju izuzetno složeni i rizični zahvati u prostoru i to: izgradnja akumulacije »Ramići« branom i uređenjem Dubokog potoka, izgradnja pumpnih stanica i potisnog cjevovoda, izgradnja akumulacije »Breštica« s rezervoarom, pumpnom stanicom, potisnim cjevovodom i betonski kanalom, te izgradnja deponije šljake i pepela, odnosno produkata sagorijevanja s pratećim sistemom transporta.

Osnovanost gore navedenog zahtjeva, ovo Federalno ministarstvo cijeno je naročito u pogledu utvrđivanja uvjeta koji se odnose na mogućnost lociranja i izgradnje ovih - gore navedenih, složenih zahvata i građevina u prostoru, a koja će se rješavati kao posebna pravna pitanja u postupku izdavanja posebnih urbanističkih saglasnosti.

Naime, osnovanost zahtjeva za izdavanje načelnog odobrenja za građenje, zahtjevala bi zbog međusobne uslovljenosti i funkcionalne povezanosti u cjelokupnom tehničkom sistemu industrijskog postrojenja - već otpočete radove na izgradnji sistema vodosnabdijevanja, ili najmanje, pribavljene akte o urbanističkoj saglasnosti za sve navedene zahvate, kako bi se potvrdila mogućnost lociranja više složenih građevina i sistema za vodosnabdijevanje, predviđenih na nekoliko potpuno odvojenih lokacija, a sve sukladno članu 37. Zakona o prostornom planiranju i korištenju zemljišta na nivou Federacije BiH («Službene novine Federacije BiH» br. 2/06, 72/07, 32/08, 4/10, 13/10 i 16/10).

Dakle, u ovom momentu nisu utvrđene bitne prethodne činjenice u vezi s tim da li su predviđeni, gore navedeni zahvati planirani u skladu s važećom prostorno-planskom dokumentacijom za područje Tuzlanskog kantona.

Imajući u vidu sve gore navedeno, a s obzirom da se radi o najvažnijim preduvjetima za funkcioniranje samog postrojenja termoelektrane koji će se rješavati kao posebna pravna pitanja, ovo Federalno ministarstvo zaključilo je da je predmetni zahtjev potrebno odbaciti kao preuranjen.

Na osnovi gore navedenog odlučeno je kao u dispozitivu zaključka.

Protiv ovog zaključka nije dopuštena žalba, ali se može pokrenuti upravni spor podnošenjem tužbe kod Kantonalnog suda u Sarajevu u roku od 30 dana od dana prijema rješenja.

